

Alt Jümpfere-Clique

Fastnacht 1926



Schnitzelbank

Die alte Jümpfere schnädere gärn,
drumm goht's uns gnau hoorglych:
Mir halte-n-is myseel nit z'rugg
und sinn kai bitzli schych!
Das soll uns kaine-n-ibel näh
mir hänn doch z'letscht emänd
e ganz e lychtends Vorbild scho
in unserem Parlamänt!

's Maggroni-Ässe-n-isch e Sach,
wo muess verschtande sy:
Will's das nit ohni Gable gäb,
schnuufft glych e Konsul dry!
Durch Schuggerchef und Ronus git's
e sunderbare Witz!
's Abfiehre het der Konsul kriegt,
und 's Mitteli — d'r Fritz!

«Sens-Unique» isch bi uns hit Drumpf,
das merket, liebi Zepf,
drumm schtehn an jedem Egge fascht
grienroti Mollikepf!
Um z'regle-n-unsere Grossverkehr,
mues hit me Händsche ha —
Syg's jetz e Hebamm oder syg's
e so-ne Hampelmaa!

E Schruubedampfer het me bruucht,
drumm het me flyssig g'suecht
viel Akzionär z'verwitsche, denn
's harzt mit em Gäld verfluecht!
Hätt me-n-e Inserätli gmacht,
schtatt sovy! G'schyss und G'schär:
Es gäbt doch Mänge gratis gärn
sy Schruubedampfer här!

Uff 's Dagblatt schpeit dr Baslerschtab
und umkehrt — 's isch e Schand!
und Jedes brielt: Was 's Ander bschyss,
das syg scho allerhand!
Dä Vorschlag, wo mir Beide gänn,
dä g'heerti gwis uusgiefert:
Sie solles aim uff Rolle gä
und grad no perforiert!

Dä Wiesethäler Sandschtaiklotz
dert uff der Batterie
schtammt nit vo unserem Kunschkredit,
doch d'Schuelig merkt me gli!
Drumm wird dä «naggti Unverschtand»
vo Aim mit Farb versaut —
Dä het vielleicht em «Hoimetland»
vo däne Drei nit traut!

Vo wäge Grafft und Scheenhait syg
dä Film doch allzueblutt
und mieh der Burgerhochmoral
bi Mängem vil kaputt!
So maint der Chef — sy Offizier
luegt no scheniierter dry —
Me ka halt gwis nit Offizier
und — Naggtliebhaber si!

Am Afang isch die Wanderschrift
rächt schych gsi — nur e Rung,
denn lychtet si und bländet witt
und kunnt gar bald in Schwung!
Es laufft no mänggi — «Wanderschrift»
und duet am Afang schych
und lychtet nit und bländet nit
und — zahlt sy mecht si glich!